

宋詞菁華

編者 劉躍進

宋詞菁華

周南



四

華寶齋書社有限公司

向子諲

向子諲（一〇八五——一一五二），字伯恭，號薌林居士，臨江（今江西省清江縣）人。紹興二十二年（一一五二）卒，年六十八。有《酒邊詞》。

水龍吟

紹興甲子上元有懷京師

華燈明月光中，綺羅絃管春風路。龍如駿馬，車如流水，軟紅成霧。太一池邊，葆真宮裏，玉樓珠樹。見飛瓊伴侶，霓裳縹緲，星回眼、蓮承步。笑入綵雲深處。更冥冥、一簾花雨。金鈿半落，寶釵斜墜，乘鸞歸去。醉失桃源，夢回蓬島，滿身風露。到而今江上，愁山萬疊，鬢絲千縷。

水調歌頭

大觀庚寅閏八月秋，薌林老、顧子美、汪彥章、蒲庭鑒，時在諸公幕府間，從游者，洪駒父、徐師川、蘇伯固父子、李商老兄弟。是夕登臨，賦詠樂甚。俯仰三十九年，所存者，余與彥章耳。紹興戊辰再閏，感時撫事，為之太息。因取舊詩中師川一二語，作是詞。

閨餘有何好，一年兩中秋。補天脩月人去，千古想風流。
少日南昌幕下，更得洪徐蘇李，快意作清遊。送日眺西嶺，得
月上東樓。四十載，兩人在，總白頭。誰知滄海成陸，萍
迹落南州。忍問神京何在，幸有薌林秋露，芳氣襲衣裘。斷送
餘生事，惟酒可忘憂。

秦樓月

芳菲歇。故園目斷傷心切。傷心切。無邊煙水，無窮山
色。可堪更近乾龍節。眼中淚盡空啼血。空啼血。子規聲
外，曉風殘月。

虞美人

宣和辛丑

去年雪滿長安樹。望斷揚州路。今年看雪在揚州。人在蓬
萊深處、若爲愁。而今不恨伊相誤。自恨來何暮。平山堂
下舊嬉遊。只有舞春楊柳、似風流。

生查子

春心如杜鵑，日夜思歸切。啼盡一川花，愁落千山月。

遙憐白玉人，翠被餘香歇。可慣獨眠寒，減動豐肌雪。

姚孝寧

姚孝寧，宣和太學生。有詞一首，見《草堂詩餘》後集。

念奴嬌

詠月

素娥睡起，駕冰輪碾破，一天秋綠。醉倚高樓風露下，凜凜寒生肌粟。橫管孤吹，龍吟風勁，雪浪翻銀屋。壯遊回首，會稽何限修竹。

今夜對月依然，尊前須快瀉，山頭鳴瀑。吸此清光傾肺腑，洗我明珠千斛。只恐嬋娟，明年依舊，衰鬢先成鵠。舉杯相勸，爲予且掛團玉。

韓駒

韓駒，字子蒼，仁壽（今四川省仁壽縣）人，徙汝州（今河南省臨汝縣）。政和二年（一一二二），召試，賜進士。紹興五年（一一三五），徽猷閣待制、提舉江州太平觀卒。有詞一首，見《草堂詩餘》後集。

念奴嬌

月

海天向晚，漸霞收餘綺，波澄微綠。木落山高真個是，一

雨秋容新沐。喚起嫦娥，撩雲撥霧，駕此一輪玉。桂華疏淡，
廣寒誰伴幽獨。不見弄玉吹簫，尊前空對此，清光堪掬。

霧鬢風鬟何處問，雲雨巫山六六。珠斗爛熳，銀河清淺，影轉
西樓曲。此情誰會，倚風三弄橫竹。

李持正

李持正，字季秉，政和五年（一一一五）進士。有詞二首，見《能改齋漫錄》。

明月逐人來

星河明淡。春來深淺。紅蓮正、滿城開遍。禁街行樂，暗
塵香拂面。皓月隨人近遠。天半鰲山，光動鳳樓兩觀。東
風靜、珠簾不捲。玉輦待歸，雲外聞絃管。認得官花影轉。

胡松年

胡松年（一〇八七——一一四六），字茂老，海州懷仁（今江蘇省贛榆縣）人。紹興十六年（一
一四六）卒，年六十。有詞二首，見《雲麓漫鈔》。

石州詞

歌闕陽關，腸斷短亭，惟有離別。畫船送我薰風，瘦馬迎

人飛雪。平生幽夢，豈知塞北江南，而今真歎河山闊。屈指數分攜，早許多時節。愁絕。雁行點點雲垂，木葉霏霏霜滑。正是荒城落日，空山殘月。一尊誰念我，苦憔悴天涯，陡覺生華髮。賴有紫樞人，共揚鞭丹闕。

洪皓

洪皓（一〇八八——一一五五），字光弼，鄱陽（今江西省波陽縣）人。政和五年（一一一五）進士。紹興二十五年（一一五五）卒，年六十八。有詞收《鄱陽集》中，近人吳伯宛從中輯出，名《鄱陽詞》。

浣溪沙

排悶

喪亂佳辰不易攀。四逢寒食盡投閒。踏青無處想家山。
麟殿阻趨陪內宴，萱堂遙憶侍慈顏。感時雙淚滴潺潺。

又

聞王侍郎復命

南北渝盟久未和。斯民塗炭死亡多。不知何日戢干戈。
賴有興王如世祖，況聞謀帥得廉頗。藺卿全璧我蹉跎。

憐落梅

重閨佳麗最憐梅。牖春開。學妝來。爭粉翻光、何遽落梳臺。笑坐雕鞍歌古曲，催玉柱，金卮滿，勸阿誰。貪爲結子藏暗蕊。斂蛾眉，隔千里。舊時羅綺。已零散，沈謝雙飛。不見嬌姿、真悔著單衣。若作和羹休訝晚，墮煙雨，任春風，片片吹。

又

去年湖上雪欺梅。片雲開。月飛來。雪月光中、無處認樓臺。今歲梅開依舊雪，人如月，對花笑，還有誰。一枝兩枝三四蕊。想西湖，今帝里。彩牋爛綺。孤山外、目斷雲飛。坐久花寒、香露濕人衣。誰作叫雲橫短玉，三弄徹，對東風，和淚吹。

臨江仙

懷歸

冷落天涯今一紀，誰憐萬里無家。三閭憔悴賦懷沙。思親增悵望，弔影覺欹斜。兀坐書堂真可怪，銷憂殢酒難賒。因人成事耻矜誇。何時還使節，踏雪看梅花。

憶江梅

天涯除館憶江梅。幾枝開。使南來。還帶餘杭、春信到燕臺。準擬寒英聊慰遠，隔山水，應銷落，赴愬誰。空恁遐想笑摘蕊。斷回腸，思故里。漫彈綠綺。引三弄。不覺魂飛。更聽胡笳、哀怨淚沾衣。亂插繁花須異日，待孤諷，怕東風，一夜吹。

訪寒梅

春還消息訪寒梅。賞初開。夢吟來。映雪銜霜、清絕繞風臺。可怕長洲桃李妒，度香遠，驚愁眼，欲媚誰。曾動詩興笑冷蕊。效少陵，慙下里。萬株連綺。歎金谷、人墜鶯飛。引領羅浮、翠羽幻青衣。月下花神言極麗，且同醉，休先愁，玉笛吹。

蔡伸

蔡伸（一〇八八——一一五六），字仲道，莆田（今福建省莆田縣）人。蔡襄孫，政和五年（一一一五）進士。紹興二十六年（一一五六）卒，年六十九。自號友古居士，有《友古詞》。

水調歌頭

時居莆田

亭皋木葉下，原隰菊花黃。憑高滿眼秋意，時節近重陽。追想彭門往歲，千騎雲屯平野，高宴古毬場。弔古論興廢，看劍引盃長。

感流年，思往事，重淒涼。當時坐間英俊，強半已凋亡。慨念平生豪放，自笑如今霜鬢，漂泊水雲鄉。已矣功名志，此意付清觴。

蘇武慢

雁落平沙，煙籠寒水，古壘鳴笳聲斷。青山隱隱，敗葉蕭蕭，天際暝鴉零亂。樓上黃昏，片帆千里歸程，年華將晚。望碧雲空暮，佳人何處，夢魂俱遠。

憶舊遊、邃館朱扉，小園香徑，尚想桃花人面。書盈錦軸，恨滿金徽，難寫寸心幽怨。兩地離愁，一尊芳酒，淒涼危欄倚遍。儘遲留，憑仗西風，吹乾淚眼。

驀山溪

登歷陽城樓

孤城暮角，落日邊聲靜。醉袖拂危闌，對天末、孤雲愁

凝。吳津楚望，表裏抱江山，山隱隱，水迢迢，滿目江南景。
羈懷易感，往事傷重省。羅袂浥殘香，鬢星星、忍窺清
鏡。瓊英好在，應念玉關遙，凝淚眼，下層樓，回首平林暝。

虞美人

甲辰入燕

綵旗搖曳檣烏轉。鷁首征帆展。高城樓觀暮雲平。疊鼓凝
笳都在、斷腸聲。綠窗朱戶空回首。明月還依舊。亂山無
數水茫茫。誰念塞垣風物、瞭恓惶。

柳梢青

數聲鶗鴂。可憐又是，春歸時節。滿院東風，海棠鋪繡，
梨花飄雪。丁香露泣殘枝，算未比、愁腸寸結。自是休
文，多情多感，不干風月。

長相思

村姑兒。紅袖衣。初發黃梅插稻時。雙雙女伴隨。
長
歌詩。短歌詩。歌裏真情恨別離。休言伊不知。

蒼梧謠

天。休使圓蟾照客眠。人何在，桂影自嬋娟。

潘汾

潘汾，字元質，金華（今浙江省金華市）人。有詞《陽春白雪》。

賀新郎

篆縷銷香鼎。翠沈沈、庭陰轉午，畫堂人靜。芳草王孫知何處，惟有楊花糝徑。正玉枕、夢騰初醒。門外殘紅春已去，鎮無聊、殢酒厭厭病。雲鬢鞦，未忺整。江南舊事休重省。但天涯、尋消問息，斷鴻難倩。月滿西樓憑闌久，依舊歸期未定。便只恐、瓶沈金井。嘶騎不來銀燭暗，枉教人、立盡梧桐影。誰伴我，對鸞鏡。

陳襲善

陳襲善，河朔掾。有詞一首，見《西湖游覽志餘》。

漁家傲

憶營妓周子文

鷺嶺峰前闌獨倚。愁眉蹙損愁腸碎。紅粉佳人傷別袂。情何已。登山臨水年年是。常記同來今獨至。孤舟晚颺湖光

裏。衰草斜陽無限意。誰與寄。西湖水是相思淚。

聶勝瓊

聶勝瓊，都下妓，歸李之問。有詞一首，見《綠窗新話》。

鷓鴣天

寄李之問

玉慘花愁出鳳城。蓮花樓下柳青青。尊前一唱陽關後，別個人人第五程。尋好夢，夢難成。況誰知我此時情。枕前淚共簾前雨，隔個窗兒滴到明。

王灼

王灼，字晦叔，遂寧（今四川省遂寧縣）人。紹興中，嘗為幕官，有《頤堂詞》。

長相思

來忽忽。去忽忽。短夢無憑春又空。難隨郎馬蹤。山重重。水重重。飛絮流雲西復東。音書何處通。

李重元

李重元，生卒年并仕履不詳。

憶王孫

春詞

萋萋芳草憶王孫。柳外樓高空斷魂。杜宇聲聲不忍聞。欲
黃昏。雨打梨花深閉門。

陳與義

陳與義（一〇九〇——一二三八），字去非，本蜀人，曾祖遷洛（河南省洛陽市），遂為洛人。
政和三年（一一一三），上舍甲科。紹興八年（一一三八）卒，年四十九。有《無住詞》。

臨江仙

高詠楚詞酬午日，天涯節序忽忽。榴花不似舞裙紅。無人
知此意，歌罷滿簾風。萬事一身傷老矣，戎葵凝笑墻東。
酒杯深淺去年同。試澆橋下水，今夕到湘中。

虞美人

大光祖席醉中賦長短句

張帆欲去仍搔首。更醉君家酒。吟詩日日待春風。及至桃
花開後、卻忽忽。歌聲頻爲行人咽。記著尊前雪。明朝酒
醒大江流。滿載一船離恨、向衡州。

臨江仙

夜登小閣，憶洛中舊遊

憶昔午橋橋上飲，坐中多是豪英。長溝流月去無聲。杏花

疏影裏，吹笛到天明。二十餘年如一夢，此身雖在堪驚。
閒登小閣看新晴。古今多少事，漁唱起三更。

張元幹

張元幹（一〇九一——？），字仲宗，自號真隱山人，又曰蘆川老隱，長樂（今福建省長樂縣）人。壽約七十餘。有《蘆川詞》。

賀新郎

寄李伯紀丞相

曳杖危樓去。斗垂天、滄波萬頃，月流煙渚。掃盡浮雲風
不定，未放扁舟夜渡。宿雁落、寒蘆深處。悵望關河空弔影，
正人間、鼻息鳴鼉鼓。誰伴我，醉中舞。十年一夢揚州
路。倚高寒、愁生故國，氣吞驕虜。要斬樓蘭三尺劍，遺恨琵
琶舊語。謾暗澀、銅華塵土。喚取謫仙平章看，過苕溪、尚許
垂綸否。風浩蕩，欲飛舉。

又

送胡邦衡待制

夢繞神州路。悵秋風、連營畫角，故宮離黍。底事崑崙傾
砥柱。九地黃流亂注。聚萬落、千村狐兔。天意從來高難問，

況人情、老易悲如許。更南浦，送君去。

涼生岸柳催殘

暑。耿斜河、疏星淡月，斷雲微度。萬里江山知何處。回首對
牀夜語。雁不到、書成誰與。目盡青天懷今古，肯兒曹、恩怨
相爾汝。舉大白，聽金縷。

滿江紅

自豫章阻風吳城山作

春水迷天，桃花浪、幾番風惡。雲乍起、遠山遮盡，晚風
還作。綠卷芳洲生杜若。數帆帶雨煙中落。傍向來、沙觜共停
橈，傷飄泊。寒猶在，衾偏薄。腸欲斷，愁難著。倚篷窗
無寐，引杯孤酌。寒食清明都過却。最憐輕負年時約。想小
樓、終日望歸舟，人如削。

蘭陵王

卷珠箔。朝雨輕陰乍閣。闌干外，煙柳弄晴，芳草侵階映
紅藥。東風妒花惡。吹落。梢頭嫩萼。屏山掩，沈水倦熏，中
酒心情怕杯勺。尋思舊京洛。正年少疏狂，歌笑迷著。障

泥油壁，催梳掠。曾馳道同載，上林攜手，燈夜初過。早共約。又爭

信漂泊。寂寞。念行樂。甚粉淡衣襟，音斷絃索。瓊枝璧月春如昨。悵別後華表，那回雙鶴。相思除是，向醉裏、暫忘却。

念奴嬌

江天雨霽，正露荷擎翠，風槐搖綠。試問秦樓今夜裏，愁到闌干幾曲。笑撚黃花，重題紅葉，無奈歸期促。暮雲千里，桂華初綻寒玉。有誰伴我淒涼，除非分付與，杯中醺醖。水本無情山又遠，回首煙波雲木。夢繞西園，魂飛南浦，自古情難足，舊遊何處，落霞空映孤鶩。

又

代洛濱次石林韻

吳松初冷，記垂虹南望，殘日西沈。秋入青冥三萬頃，蟾影吞盡湖陰。玉斧爲誰，冰輪如許，宮闕想寒深。人間奇觀，古今豪士悲吟。蒼弁丹頰仙翁，淮山風露底，曾賦幽尋。老去專城仍好客，時擁歌吹登臨。坐揖龍江，舉杯相屬，桂子落波心。一聲猿嘯，醉來虛籟千林。

又

題徐明叔海月吟笛圖